



Fundasaun Mahein (FM), 29 Dezembru 2020

Komunikadu Imprensa

## Polítika Sosa Armas ba PSIK no Nia Kontrolu

Dekretu-Lei N.º 21/ 2014 de 6 de Agosto 1.ª Alteração ao Decreto-Lei n.º 15/2014, de 14 de Maio, Orgânica Polícia Científica de Investigação Criminal (PCIC/PSIK) hatuur PSIK hanesan korpu superiór polísia kriminál, ne'ebé organiza tuir ierarkia iha Ministru Justisa nia mahon ho autonomia administrativa, finanseira no patrimoniál. Husi dispozisaun Lei kriausaun PSIK nian difine mos uzu no porte arma husi membru PSIK sira. Tuir artigu 20 autoridade polísia kriminál sira, pesoál investigasaun kriminál no pesoál ausiliár investigasaun kriminál nian iha direitu ba uzu no porte ba kilat servisu nian, kalibre no tipu aprovalu husi diploma ministerial Ministru Justisa nian.

Husi dispozisaun artigu 20 nian, Ministériu Justisa iha loron 24 Maiu 2017 hasai ona diploma ministerial ida hodi define kona-bá arma fogu ne'ebé utiliza husi pesoal PSIK sira maka Diploma Ministerial N.º 33/2017 de 24 de Maio Aprova o Tipo e o Calibre das Armas de Fogo de Serviço do Pessoal da Polícia Científica de Investigação Criminal. Ho Diploma Ministerial ne'e define tipu kalibre ba armas fogu ne'ebé pessoal PSIK iha direitu uza ho tipu pistola kalibre 9 X 19 mm.

Maske nune'e, desde tinan 2017 diskusaun naruk pro no kontra ligadu ho polítika sosa armas ba PSIK tamba tetu ba mekanismu no prosedementu utilizasaun nian nomos ninia risku sira.

*Primeiru*, PSIK nia natureza sientífika, ho apoiu laboratóriu polísia sientífika nian, nu'udar sentru prinsipál liu ne'ebé fó apoiu ba investigasaun kriminál no garantia ne'ebé metin no rai didi'ak buat hirak ne'ebé sai nu'udar prova, no responsável ba rekolla, tratamentu no ezame ba vestíjiu krime nian no perísia forense, hodi hatán buat hotu-hotu no hatán nafatin ba nesesidade investigasaun kriminál sientífika no ho konfiansa. Exemplu, kazu kontentor 9 (sia) materia prima PCC (*Paracetamol, Caffein, Carisoprodo!*) ne'ebé autoridade seguransa prende iha Janeiru 2018, lolos ida ne'e Timor-Leste ho institusaun ne'ebé barak-barak bele halo ona investigasaun rasik ka exame ba substansia ka materia prima PCC. Maibe tamba Timor-Leste seidauk iha laboratoriu propriu hodi halo testu ka exame ba substansia hirak ne'e. Nune'e tenke utiliza kooperasaun sira ne'ebé iha hodi ba testu iha Indonézia.

Ho ida ne'e, nesesariu tebes atu dezenvolve PSIK iha kapasidade investigasaun sientífika ida hodi tulun autoridade judisiariu sira iha prosesu penal nian. Nune'e PSIK bele atua tuir ninia natureza no nia misaun ne'ebé atribui ba sira iha ambitu investigasaun krime grave, organizada ka kompleksa.

*Segundu*, hanesan presedente aat ida ba futuru – institusaun investigasaun sira no seguransa sivil sira hanesan Komisaun Anti Korupsaun (KAK), Autoridade Aduaneira ka Alfândega, Guarda Florestal, Guarda Munisipiu Dili, Guarda Prizional, Migrasaun no Dirasaun Nasional Seguransa Patrimoniu Públiku (DNSPP) sei ejje atu hola tan armas tamba hotu-hotu servisu iha risku nia laran. Posibilidade ida ne'e sei akontese tamba institusaun hirak ne'ebé temi iha leten ne'e balu simu ona treinamentu kona-bá utiliza armas hanesan KAK no Alfândega.

*Terseiru*, efeitu husi armas - mentalidade husu funu naruk ka konflitu armadu ne'ebé Timor-Leste hakat liu, no to'o agora seidak rekopera lolos husi trauma. Ninia konsekuensia ita forma institusaun kiik ka boot tenke ho armas. Nune'e mos ita rezolve violênsia sempre ho violênsia. Iha sorin seluk, tinan-tinan efeitu husi utiliza sala armas sai preokupasaun boot ba armas sira ne'ebé sosa ba institusaun sira Estadu nian. Aprende husi akontesementu sira iha pasadu kona-bá utiliza sala armas no kontrola armas. Exemplu iha fulan Novembru 2018 kazu Kulu-Hun – Dili, ema na'in tolu mate no na'in lima seluk kanek tamba konsekuensia husi utiliza sala armas no armas ne'ebé deskontroladu. Ne'e hanesan exemplu ida katak institusaun sira ne'ebé harii kleur ona, ne'e mos sei nafatin problema ho kontrolu ba armas no dalabarak utiliza sala.

Maibe, desizaun Governu nian kontinua sosa armas, pratikamente armas iha ona PSIK nia liman, ho mekanismu sira kontrolu nian ne'ebé foin estabelese daudauk tenke rigor mos iha ninia implementasaun bainhira utiliza armas iha asaun sira polisial nian.

## **Rekomendasaun**

1. Parlamentu Nasional kontinua halo funsaun sira fiskalizaun nian ba servisu tomak PSIK nian, liu-liu utilizasaun armas no auditoria anual ba armas ne'ebé PSIK utiliza.
2. Ministériu Justisa no Superior sira PSIK nian aplika ho rigor kona-bá regra ka regulamentu distribuissau, uza no forte armas nian hodi prevene hahalok sira ne'ebé bandu iha regulamentu utilizasaun nian durante asaun sira polisial nian no la sai hanesan ameasa ba institusaun seluk no populasaun sira.
3. Públiku tomak no Provedoria Direitu Humanus no Justisa (PDHJ) kontinua tau matan hanesan kontrolu externa ba armas 75 (hitu nulu resin-lima) ne'ebé daudaun ne'e iha PSIK nian liman no utiliza deit tuir Lei no regulamentu sira.

Atu hetan informasaun kle'an liu kona-bá asuntu ne'e bele kontaktu:

### **João Almeida**

Acting Director

Email: [almeidamahein@gmail.com](mailto:almeidamahein@gmail.com)

Telemovel: (+670) 7756 1184

Website: [www.fundasaunmahein.org](http://www.fundasaunmahein.org)